



SUPPLICATIONES UNIVERSITATIS STUDIORUM

NOS FRANCISCUS-NICOLAUS GUERIN, RECTOR Universi Studii Parisiensis, Mandamus præcipimusque omnibus & singulis ejusdem Universitatis Doctoribus, Magistris, Clientibus & Administris, cujuscumque sint conditionis aut gradûs, ut memores Jurisjurandi, quo suam Academiæ fidem obstrinxerunt, die Martis duodecimo mensis Octobris adsint apud Mathurinenfes horâ ipsâ sesqui-sextâ, ornati ut decet, indè, post brevem Orationem, a nobis habendam, ad Ædem Deo sacratam sub

invocatione *SANCTI LUDOVICI* in Regiâ *INVALIDORUM* Domo ritè processuri, Deo Optimo Maximo piè supplicaturi, pro Fidelium concordîâ, hæreseôn extirpatione, hujusce florentissimi Regni salute atque pace, pro *REGIS & REGINÆ, DELPHINI & DELPHINÆ*, totiusque Regiæ Profapiæ incolumitate, nostræ Academiæ tranquillitate & Dignitate, frugibus terræ, aëris salubri temperie, & cunctis rebus humano generi secundum Deum necessariis.

AD has, quæ ordinariæ sunt, Supplicationum nostrarum causas accedent justissimæ Gratiarum Actiones, propter cumulata Galliæ vota recenti Serenissimæ *DELPHINÆ* Partu. Quo Religionis officio jam defuncta in privatis Collegiorum Sacellis Universitas, idem hæctenùs per inducias Academicas solemnî apparatu, solitâque frequentîâ præstare non potuit. Itaque, ad publicum nostræ Pictatis & lætitiæ testimonium, nihil in tali eventu magis aptum esse duximus, quàm si Sacram eligeremus *Ædem* in eâ Domo, quæ, præstantissimum totâ Europâ Regii animi monumentum, vel ipso aspectu indicat, quanto Divinæ Providentiæ beneficio nascantur *PRINCIPES* in eâ Familiâ, ex quâ Reges sint & in suos tam humanè liberales, & in Deum tam magnificè Religiosi. Ne quid hujus diei splendori ac celebritati desit, Sacrificium Hostiæ Salutaris offeret, pro suâ in nos benevolentîâ, Illustrissimus *ARCHIEPISCOPVS*. Peractò Sacrificio, cantabitur

Hymnus *TE DEUM*, ac deindè eodem ritu atque ordine, quo processum fuerit, ad Mathurinenses redibitur.

PRÆTEREA notum facimus ordinaria præclaræ Artium Facultatis Comitia habitum iri die Jovis decimâ quartâ hujus mensis.

DATUM in Ædibus nostris SORBONÆ-PLESSÆIS, die Martis quintâ mensis Octobris, anno Domini millesimo septingentesimo quinquagesimo primo.



Ex Typographiâ THIBOUST, REGIS, nec-non Academiæ
Parisiensis Typographi, in Platcâ Cameracensi, 1751.